

Na osnovu člana 22. stav 2. i člana 58. stav 4. Zakona o upravljanju otpadom ("Službene novine Federacije BiH", broj: 33/03) federalni ministar prostornog uređenja i okoliša, donosi:

**PRAVILNIK**  
**O UVJETIMA ZA PRENOS OBAVEZA UPRAVLJANJA OTPADOM SA**  
**PROIZVOĐAČA I PRODAVAČA NA OPERATERA SISTEMA ZA**  
**PRIKUPLJANJE OTPADA**

**I OPĆE ODREDBE**

Član 1.

Ovim pravilnikom propisuju se uvjeti pod kojima proizvođač i prodavač mogu prenijeti svoje obaveze upravljanja otpadom (u daljem tekstu:obaveze) na operatera sistema za prikupljanje otpada (u daljem tekstu: operatera) putem ugovora ili sporazuma.

**II OBAVEZE KOJE SE PRENOSE**

Član 2.

Obaveze proizvođača koje se mogu prenijeti na operatera su:

- 1) ispunjenje minimuma uvjeta u pogledu sakupljanja, ponovnog korištenja i reciklaže otpada;
- 2) ispunjenje minimuma uvjeta za odlaganje, posebno za deponije;
- 3) postupanje sa otpadom na okolinski prihvatljiv način.

Član 3.

Obaveze prodavača koje se mogu prenijeti na operatera su:

- 1) povrat ili nadoknada depozita za proizvode i ambalažu
- 2) prikupljanje na selektivan način proizvoda i ambalaže koji su na kraju životnog ciklusa.

Član 4.

Proizvođač i prodavač mogu na operatera prenijeti sve ili samo dio svojih obaveza iz čl. 2. i 3. ovog pravilnika.

**III UGOVOR**

Član 5.

Prenos obaveze proizvođača i prodavača iz čl. 2. i 3. ovog pravilnika vrši se putem sporazuma ili ugovora između individualnih proizvođača ili prodavača sa jedne strane, i operatora sistema za prikupljanje otpada sa druge, ili između cjelokupnog sektora, ili putem korištenja ekonomskih instrumenata ili drugih mehanizama koji će služiti kao motivacija operatorima da preuzmu ovu djelatnost.

## Član 6.

Ugovor ili sporazum o prenosu obaveza zaključuje se u pismenoj formi i sadrži:

- 1) obim usluga operatera,
- 2) vremenski rok za koji ugovor važi,
- 3) vrste otpada i postupak odlaganja/obrađivanja,
- 4) količinu ili zapremninu otpada,
- 5) način isporuke ili preuzimanja otpada,
- 6) obaveze i odgovornosti obje strane,
- 7) odgovornost operatera za postupanje sa otpadom u smislu njegovog ponovnog korištenja, reciklaže, tretmana ili konačnog odlaganja na okolinski prihvatljiv način,
- 8) način rješavanja spora u slučaju nesporazuma ili ne ispunjavanja obaveza,
- 9) načine i uslove/uvjete plaćanja
- 10) vremenski rok za ispoštovanje obaveza.

## Član 7.

U slučaju opasnog otpada, ugovor se ovjerava kod nadležnog suda i sadrži dodatno:

- 1) način pakiranja i uslove za isporuku,
- 2) osiguranje otpada u prevozu.

## Član 8.

U slučaju raskida ugovora, ili nemogućnosti operatera da izvrši ugovorene obaveze proizvođač i prodavač su odgovorni za obaveze definisane čl. 16., 18., 21. i 22. Zakona o upravljanju otpadom osim ako to nije drugačije ugovorom regulisano.

## Član 9.

Operater mora da bude registrovan za izvršavanje djelatnosti koje se nalaze u ugovoru, te mora da ima dozvolu za upravljanje otpadom ili okolinsku dozvolu.

U slučaju zbrinjavanja opasnog otpada, operator mora da bude registrovan, te da posjeduje sve dozvole za rukovanje i zbrinjavanje ove vrste otpada.

## IV PRELAZNE I ZAVRŠNE ODREDBE

### Član 10.

Obaveze definisane u čl. 2. i 3. ovog pravilnika, te odgovornost za ispunjenje ovih obaveza snose sami proizvođač i prodavač.

Nakon zaključenja ugovora iz člana 6. ovog pravilnika operater preuzima svu odgovornost za okolinski prihvatljivo upravljanje otpadom u ime proizvođača i prodavača.

Ukoliko iz bilo kojih razloga dođe do raskida ugovora iz člana 6. ovog pravilnika sva odgovornost prelazi na proizvođača i prodavača.

Član 11.

Ovaj pravilnik stupa na snagu osmog dana od dana objavljivanja u “Službenim novinama Federacije BiH”.

MINISTAR

Ramiz Mehmedagić, s.r.